

國學基本叢書
續行水金鑑

三

國學基本叢書

續行水金鑑

(三)

黎世序等纂修

商務印書館發行

續行水金鑑總目

圖一卷

河水圖六 附沁水圖一

淮水圖二

運河圖八 附圖三

永定河圖

江水圖

書一百五十六卷

河水 第一卷至第五十卷

淮水 第五十一卷至第六十四卷

運河水 第六十五卷至第一百三十二卷

永定河水 第一百三十三卷至第一百四十五卷

江水 第一百四十六卷至第一百五十六卷

續行水金鑑卷第三十二

河水章 版二十九

嘉慶九年正月初九日吳礪奏。臣接奉上諭。前據吳礪等奏。徐城以下河槽高埂及一切淤淺處所。均已確切勘估。擬於年內一律疏濬。當經降旨撥項。令卽日興工矣。本日召見莫瞻菴。據稱徐城以下高埂較多。推原其故。因二十年前徐州府知府王兆棠遇搶險時。不及趕辦埽工。遂多運山石在南岸堵禦。保衛城池田廬。甚爲得力。嗣後河員等因有成效。每遇搶險時。卽如此辦理。歷屆督臣河臣亦深以爲便。而石塊愈積愈多。不免層層下壓。沈至河心。隨流激蕩。其質沈重。易於堆聚。其勢參差。更易挂淤。現今高埂情形。未必不由於此。此時動帑挑淤。其舊積石塊。自必撈挖淨盡。但思日後搶險時。仍不能不如此辦理。若待十數年後再行挑濬。則淤墊較深。且於帑項糜費。應請敕下河臣等。歸入歲修項下辦理等語。徐城以下高埂之處。總由海口阻塞。黃河下游不能宣暢。致積淤成埂。莫瞻菴所稱河心積石堆聚。致有挂淤。恐受病之原。未必盡係於此。且河工搶險。亦未有專用石塊埽塞者。歷屆南河奏報搶險情形。從未及此。但旣言之。鑿鑿自必有所見聞。著傳諭吳礪。將莫瞻菴所奏情形。詳加體察。該處向來搶險。是否如此辦理。河身是否因此受病。若果如莫瞻菴之言。此次疏濬後。將來應否歸入歲修項下。隨時辦理。俱卽詳查。據實具奏。欽此。伏查徐州城外黃河逼近城垣。是以建有大石工。以爲捍衛。石工外卽係大溜經行。其頂衝著重之處。仍用料鑲築埽段。以護石隄。每年歸於歲搶修辦理。而石工甚長。不能一律鑲埽。致多糜費。是

以將碎石拋填。保護根脚。頗資鞏固。臣前在河東。卽傳聞徐州城外所拋碎石。衝入河心。致有梗阻之語。嘉慶五年春。調任南河時。邵壩尚未堵合。徐州城外河身淤成平陸。臣見石工根脚拋有碎石。不過護住隄根而止。並未挺入河心。恐或有隨水衝激。滾至中泓填塞之處。當用二丈四五尺長之大鐵筴。在河心逐段錐試。俱深插入土。並無石塊頂住。是年冬。邵工疏挑引河。亦未見起出石塊。始知人言多以意料。每難憑信。迨邵壩合龍。河歸故道後。嘉慶六年。臣察看徐城石工。尙有卑矮之處。而東門迤下石磯嘴一帶。溜勢湧注。石隄著重。同前督臣費淳會商具奏。將石工卑矮者加高一二三層。並於溜急之處。酌做碎石挑壩六道。其壩順勢斜。長不過十餘丈。寬五六丈至十餘丈不等。不特石隄藉保穩固。兼可資挑溜之力。蓋以寬數百丈之河。僅於崖崖處所護此十餘丈之石壩。本無佔礙。且石質沈重。豈能隨流激蕩。洶至河心。現在各石壩皆完整可驗。而徐城河身仍水深一丈數尺。其無石塊坍卸阻塞。確無可疑。至河工搶險。事在呼吸立時下壩搶築。尙恐趕辦不及。若待開採山石搬運到工。卽近山之處亦難朝發夕至。其遲誤必矣。是以歷來搶辦險工。誠如聖訓。從未有專以石塊垛塞之事。惟本有埽工之處。若以石塊包壓。實能抵禦大溜。屹立不動。又如溜勢將欲趨注。而尙未緊逼隄根。卽趕運碎石砌築。較埽工更可堅固。經上年大汛時。銅沛廳茅家隄及郭汛兵七堡。臣督同徐州道徐端察看形勢。會酌用碎石保護保守。實爲得力。亦並不致阻礙河流。均經陳奏。然亦祇能於近山一帶平時採運。陸續辦理。其堅羣遠勝埽工。且可歷久不壞。不似埽工時有墊場朽腐。致多每年拆修之費。惟採運工價倍於埽工。以久遠而計。其所需轉省。以一時而論。則所費較繁。是以未能多辦。至黃河源遠流長。自河南滎澤縣廣武山以下。始有隄埽工程。

奔騰二千餘里乃至江境。海口道里繇長。通塞勢難定準。有時淤在上而下仍通暢。亦有上游通順而下游忽形淤淺。歷考書誌所載情形。時有遷移。非可執一而論。卽如嘉慶七年秋汛異漲。徐城以上豐碭一帶。黃河節節停淤。僅深四五六尺。幾無河槽。而徐城以下各廳境內。水勢皆深至一丈七八尺至二三丈不等。流行甚暢。迨八年伏汛後。上游豐碭等境。河身刷深至二丈以外。徐城上下水亦旋長旋消。而下游宿桃外河山海等廳。忽形淤淺。此又兩年來臣與官弁兵民目所共覩者。不但石塊壅阻之說。杳無其事。卽挖淤挑淺之工。亦難久恃。推原其故。緣黃河挾沙而行。趨向莫測。東埧則西長。此淺則彼深。水性使然。變遷靡定。卽能將淤處挖去。不能禁其水過復淤。卽能將淺處挑深。不能禁其他處又淺。是以向來談河聚訟紛紜。迄無一勞永逸之計。臣數年來參考載籍。虛心講求。黃河宜合不宜分。以水治水。似究屬至當不易之論。蓋正河一經旁洩。勢必溜緩沙停。如果隄埧工程加緊防護。能保數年或十數年無事。不使旁溢。則全溜總在河內衝刷往來。卽有淺處稍阻。仍有深處暢流。且淺處亦可刷透。深處更可加深。以理揆之。束水攻沙。自勝於人力遠甚。而修守之功。節宣之道。要在隨時設法。因地制宜。他如混江龍鐵籠子等項。量爲使用。究可助益。現今製造試行。亦疏導通利之一法。奉上諭。徐城以下高埧。總由海口阻塞。黃河下游不能宣暢。以致積淤成埂。莫瞻菴所稱河心積石堆埧。或有挂淤等弊。旣據吳璥查明。徐城河身水深一丈數尺。實無石塊埧卸阻塞。確切無疑。自係莫瞻菴誤聽人言。妄行陳奏。竟可毋庸置議。該河督參考載籍。虛心訪求。惟束水攻沙一策。較勝於人力遠甚。應卽督同文武各員。刻刻留心籌度。因地制宜。妥爲經理。現在豫省堵築工程。已得十之七八。約計二月中旬。定可合龍。河歸故道。彼時下游一帶。必須暢

注入海。方不致別生他患。務宜將淤墊處所。早爲疏濬。不可稍存畛域之見。儻衛工合龍後。全河下注。稍有壅滯。則惟吳墩是問。至混江龍鐵篋子等項。遇有挾沙停淤處所。用資爬剔。此實前人遺法。該河督現已飭令製造。試行於疏導。自不無裨益也。南河成案續編

是日吳墩奏。豫省衛工以下。斷流江境。黃河不無淤墊。臣屢奉訓示。令擇要疏濬。俾得順軌進行。當將應行疏挑各工段。勘估具奏。一面飛飭該道廳等。募夫興挑。並令將挑出之土遠送。不許堆積河心。仍致妨礙。臣臘月間。勘查海口事竣。即由下游各廳沿途查至徐屬。逐段履勘。分別勸懲。復細案形勢。於原估外。尚有應量爲疏濬之處。即派令各汛兵堡人夫。協力僨挑。總以上下積水一氣流通爲度。茲已陸續據報工竣。自豫省衛工引河尾以下。直至江境交界。應行挑挖處所。前經派委副將汪德。署參將王福等前往幫辦。旋據該省咨會。業委多員。足敷趕辦。副將汪德等。卽已回江。而兩省同此一河。通塞相因。臣與那彥寶。稽承志。馬慧裕等。仍時相關會籌商。以期同歸順暢。此時豫省挑工。聞亦竣事。現今彼此知會。正月望間。先試放清水。以驗河底是否通順。臣已飭各工員。先將所挑工段內。埂界餘土。起除淨盡。以備上游清水下注。不使稍有阻礙。南河成案續編

三月二十四日。那彥寶。戴均元。稽承志。奏。豫省衛家樓漫口。臣那彥寶。於上年九月抵工。值上游秦家廠堰工頻頻出險。瀾漫一百數十里。幾成巨浸。當經首將秦家廠險工趕緊搶築。以截沿隄下注之橫流。一面相度壩基。展往迤南。並酌挑引河。俾得吸川之勢。節經繪圖分晰具奏。嗣奉諭旨。命將引河僨先辦竣。庶免冰凝凍結之虞。查臣等所擬引河丈尺。加倍寬深。藉資容納。卽使受淤。亦尙可措手。實由竣工後時。

日較寬。得以疊次收拾。一律通深。臣等每次奏報丈尺。雖奉諭旨飭催。總令詳慎經理。二月以後。屢展旬期。悉荷寬涵。至北岸上游。一舉竣事。本屬至難。在工次且人異其辭。卽臣等亦實難預料。今五百餘丈之大壩。加以上下水邊埽。寬厚凝重。墊而愈堅。二十五里之引河。自三月二十二日啓放後。日加通暢。當功屆將成之際。大溜由西南全注引河。不惟不趨近壩身。並由金門之外委順而行。乃向來口岸工程所罕覩者。嗣於挂纜後。臣等督率文武員弁。齊集土料。儘力搶堵其上下水邊埽。亦分投鑲護。卽於是日亥刻。一氣追壓到底。金門立見斷流。探量壩前已淤五尺。大壩周身並無滲水之處。隨復加壓重土。於金門外趕做攔門大埽。全河溜勢由引河暢然下注。仍循故道。所有下游各廳。已預飭備辦。並飛咨江南山東直隸等省一體知照。從此循流順軌。而糧船銜尾過行。速達天庾。皆皇上恩福所賜。臣等幸得觀成。倍殷歡忭。所有應建河神廟。並補還原隄各工。一切規制繪圖。另行具奏。奉上諭。本日據那彥寶等馳奏。衡工大壩合龍穩固。河歸故道。覽奏實深感慰。豫省衡家樓地方。自上年九月間。因黃水漫溢北趨。特命那彥寶馳往工次。偕嵇承志馬慧裕督率員弁。儼辦堵合。半年以來。宵旰縈懷。無時稍釋。節經指示機宜。挑挖引河。相度鳩築。朕日惟齋心默禱。虔籲安瀾。速蘇民困。幸三冬天氣暄和。得以及時施工。迨至本年二月間。壩工進占。將次合龍。適因風力陡急。東壩間有墊塌事。機小挫。朕益深敬畏。不敢稍有怨尤。惟堅持定見。諭令那彥寶等竭力堵築。盡人事以迓天庥。茲據奏稱。引河日加通暢。大溜由西南全注。委順而行。那彥寶等於二十二日挂纜之後。儘力搶堵。卽於是日亥刻追壓到底。金門立見斷流。隨於金門外趕築攔門大埽。全河暢然下注。仍循故道。此實仰賴昊蒼眷佑。祖考垂慈。始能一舉竣工。萬姓蒙福。朕與中外臣庶。

同茲叩感。曷能言喻。特發去藏香二十枝。著那查寶等虔赴工次各河神廟。並於口門地方。代朕敬謹申謝。以答靈貺。至那查寶等在工經理。不遺餘力。勉歲鉅工。自宜特沛恩施。以示獎勵。河北道冊。

四月十三日吳礪奏。臣接奉上諭。此次衛工合龍。仰賴天恩祖考默佑。事機順利。一舉竣工。朕銘感之中。倍深兢惕。敬念天道盈虛。消息之理。非思議所能窺測。此時豫境得慶安瀾。江境下游一帶隄防。在在均關緊要。朕不敢稍存滿足之見。吳礪暨在工各員。尤當倍加敬畏。時時懷有備無患之心。江境一切工岸隄埽。實力修培。小心防守。俾河流循軌暢達。永慶平寧。此爲至要。再雲梯關入海口門。爲全河下注尾閘。吳礪卽派委妥實大員。馳往測探。是否溜勢通暢。駛行無阻。據實覆奏。欽此。又承准軍機大臣字寄。初三日奉上諭。吳礪奏衛工合龍。全河已歸故道。江境水勢暢順。各工平穩情形。一摺。覽奏俱悉。此時全河已歸故道。又將屆夏令水長之期。所有江境一帶隄工。均當察看情形。加壓鑲高。預爲防守。該河督務須嚴飭所屬。擇要妥籌。斷不可因全河均各安瀾。致任防護各員稍形鬆懈。總宜加倍敬慎。俾伏秋大汛經臨。永臻鞏固。方爲不負委任。欽此。仰見我皇上廬念河防。敬體天道之盈虛。期於有備無患。訓誡至爲深切。查黃水下注後。江境溜行順暢。並臣歷各工勘辦。籌催重運各情形。已於四月初四日具奏。伏念黃水初歸故道。溜勢趨向未定。兼值夏令長水之期。均宜慎重防範。而海口爲全河尾閘。尤關緊要。臣前在徐屬上游。督飭徐州道相機防禦。一面卽飭淮揚道確查下游水勢情形。據稟山安海防兩廳境內黃河。於三月二十五六等日。同時陡長水四尺七八寸至五尺。大溜奔騰。並無壅滯。其雲梯關以下黃泥嘴地方。因河勢盤曲兜灣。上年十二月奏明取直開挑。已於三月趕辦完竣。此次黃水到後。卽由新挑引河內徑直

東趨形勢頗爲暢順。臣按上下游各廳水誌長落尺寸。細爲比較。當黃水初至。各工驟長水五六尺至九尺。餘寸不等。旬日內各工已消水二尺四五寸至三尺一二寸。按此情形。消落尙速。卽去路通暢之明驗。第河性變遷不定。通塞靡常。且水甚渾濁。倍於平時。自係上下游兩廳所停淤沙。一路隨水衝刷而下。須俟淤漸刷盡。河底亦日漸寬深。斷不敢因河復安瀾。稍任工員鬆懈。已派委淮揚道曹恆親赴海口。並先帶妥幹員弁。確切測探。攔門灘上。現在過水深若干尺寸。比較上年十二月查看時。有無加深。溜行是否迅駛通暢。俟該道勘明稟到。另行覆奏。至徐州淮揚各屬。應培隄堰。應鑲埽壩。現俱趕緊修築。並察勘溜勢之趨向。漸近隄根處所。飭令預購料物。多積土牛。以資備防。復添派効力候補人員。節節分段巡查。周密防守。其形勢稍緩之處。亦不任輕易鑲埽。致多糜費。南河成案。續編。

是月二十五日。吳璥奏。臣欽奉諭旨。派委妥實大員。馳往雲梯關外黃河入海口門測探。是否溜勢通暢。駛行無阻。據實覆奏。欽此。臣遵卽委令淮揚道曹恆親往測探。茲據該道帶同海防廳營並妥幹員弁。卽自外河廳境之老壩工坐船。由黃河中泓。以次測量。順流而下。查外河山安海防等廳境內。長河水深七八九尺至一丈。其坐灣靠埽處所。水深一丈二三尺至二三丈不等。大溜東趨迅駛。所有上年十二月奏明取直開挑之黃泥嘴新河。河頭河尾已漸塌寬深。吉家浦等處挺出之灘。俱挑切如式。水勢流行甚順。該道於四月十五六日。在新淤尖海口地方。候潮水落枯時。駕船逐段測探。新淤尖一帶水深一丈六七八尺不等。較上年黃水斷流時加深三四五尺。河面亦加寬一百餘丈。其攔門沙之上。現在水深六七八尺不等。亦較去冬黃水未到時水面加增二尺有餘。滔滔外注。甚爲湍激等情。開具圖說呈送。臣悉心覆

按上年十二月臣親至海口查勘時黃水斷流僅係清水外出是以水勢較爲淺窄今全黃下注匯淮入海自應較前寬深以現在新淤尖一帶水深尺寸核算比較河身均屬通暢即以攔門沙上過水尺寸計算雖水底之沙未能刷動加深而以寬闊丈尺抵算水方去路宣通溜行迅駛亦尙不致阻遏所慮秋汛海潮旺大則難免頂托漲滿之虞臣凜遵審訓督率各員堅築隄堰勤修埽壩在在周密防守以期漸收束水刷沙之實效奉上諭吳勲奏查明黃河海口通暢情形一摺據稱雲梯關外黃河入海口門此次派員測探新淤尖一帶水深一丈六七八尺較上年加深三四五尺不等河面加寬百餘丈其攔門沙之上亦較去冬水面加增二尺有餘現在水勢滔滔外注等語海口一帶水勢既已較前增長去路通暢目前並無阻遏之虞但吳勲摺內有慮及秋汛海潮旺大難免頂托漲滿之語此則甚有關係不可忽視全黃之水惟恃海門消納始得順軌無虞若一經海潮頂托尾閘不能暢注則河身漲滿各工在在可慮不可不先事籌備該督惟當督率工員等將各工隄堰埽壩加倍小心防範卽日大汛經臨海潮頂托之時所有上游工段務期一律鞏固束水刷沙俾得順軌安瀾不可稍涉大意又據另片奏江蘭請暫留工次守汛等語刻下伏汛將臨自應酌留熟諳之員幫同防守江蘭著准其留工協防俟南河防汛事畢再令來京南河成案續編

是月嵇承志內遷命徐端爲河東河道總督

六月初四日吳勲奏臣於初三日接奉上諭朕因聞本年豫省合龍後黃流由雲梯關入海不甚暢利竟有分溜直入洪澤湖及淮揚一帶運河倒灌較往年爲甚此事殊有關係海口一帶舊有阻遏上年豫工

未經合龍時。朕早爲慮及。節經降旨吳璥。令其親赴海口一帶詳悉察看。隨機酌辦。務爲一勞永逸之舉。不可惜費畏難。申諭甚爲明切。該督每次奏到。皆言雲梯關一帶出水通暢。惟請再將黃泥嘴新河等處取直開挑。以收束水刷沙之益。本月初旬復據奏稱。各工業經挑切如式。河水滔滔外注。並無阻遏等語。今黃流分溜直入洪澤湖運河。是海口之不能通暢。已可概見。現在未交大汛以前。已形倒灌。將來伏秋大汛。清黃並漲。洪澤湖不能容受。各處工程豈不大形危險。海口阻滯本非一日。亦並非吳璥一人任內之事。但上年有旨。特交吳璥查辦。何以吳璥並不通盤籌畫。意涉因循。以致本年黃水倒灌。甚於往年。該督前此辦理畏難。自不免存惜費之見。殊不知顧惜小費於前。即不免多糜帑金於後。試思海口消納不暢。洪澤湖又遭淤淺。則河身漲滿。濱河州縣在在可危。彼時設有漫溢。工鉅費繁。又將如何辦理。吳璥即不惜身家。更於國事何益。著傳諭吳璥。即查明現在河水倒漾情形。究竟有無妨礙。務即設法籌備。以期汛水順軌無虞。工程一律鞏固。不可遲緩貽悞。仍一面將現在黃河水勢。及何如籌辦之處。即據實山驛覆奏。欽此。伏查南河清黃交匯之區。乃全河關鍵最要機宜。高宗純皇帝臨御六十餘年。無時不以清口情形上煩睿慮。指示河臣籌畫。總以蓄清敵黃。暢出刷沙。爲淮黃並治之要策。臣服膺恪守。未敢稍忘。但黃強淮弱。由來已久。每當春令。淮水未長。輒致倒漾。溯查歷年皆有之事。其最甚者。乾隆五十年因久旱水枯。洪澤湖僅存水二尺二寸。是年秋冬及五十一年春。自河口以達淮揚運河。悉係借黃濟運。清口淤成平陸。直至夏秋。淮水長發。始得暢出敵黃。而河勢亦即復舊。此向來河口倒灌時塞時通之實在情形也。上年九月。豫省衛家樓旁溢黃水斷流。河工一帶專仗湖水灌注。浮送漕船。自冬及春。竭力收蓄。截

至三月底。高堰誌椿尙存水六尺。時衡工合龍。全黃驟至。清水力不能敵。遂卽倒漾。與往年情形相仿。經臣及漕臣吉綸節次奏明。查江境黃河長一千數百里。河面寬數百丈。惟徐城及外河順黃壩至窄之處。亦將及百丈。去秋黃水陡落。普律受淤。臣欽遵諭旨。勘估挑濬。祇可將河心行溜之處。擇要疏挑。俾不致阻遏爲慮。其兩灘之淤。萬無如許金錢。如許夫役。全用人力起除之理。亦經陳奏。原期黃流復故。後自能刷深加寬。但向來大工合龍。總在冬底春初。於汛水未長之前。刷濬數月。則河皆復舊。長水時卽可容納有地。今衡工於本年三月下旬合龍。河未刷寬。已交夏令。水在中泓行溜之地。雖無阻遏。而兩灘淤沙。勢不能一時刷去。容水之地較少。是以水面擡高。致形浩大。黃水初到時。較量河口誌椿。黃水高於清水三尺。致驟然倒漾。倍形湧激。漕運商民各船逆流出口。絳挽較艱。遂疑分溜過半。其實正河之水。仍係滔滔東注歸海。蓋緣洪澤湖上游。淮水來源。於三月下旬水卽長發。以後清水日長。湖水充滿。黃水至太平引河卽兩相頂阻。清水雖力難外出。而黃水亦不能入湖。其運口各草壩。經臣督飭道廳竭力收窄。止留口門四丈。以寬至二三百丈之黃河。所分入運僅寬四丈。按水方計算。何能分溜過多。此本年黃水倒灌之實在情形也。自五月下旬以來。清水益旺。高堰誌椿共存水一丈二尺八寸。已由清口暢出。敵黃東注。現在河口一帶及淮揚運河。悉係清水流行。迴非五月上旬情形可比。此後黃運兩河正可淘刷加深。至海口橫沙高仰。誠如睿訓。本非一日。亦並非臣一人任內之事。何敢稍爲因循回護。臣上年冬親往確切查看。黃河入海之處。水底橫沙形如魚脊。橫沙之內。水深一丈二三四尺。沙脊之上。僅過水四五六尺。與乾隆四十一年前督臣高晉河臣薩載所奏情形相同。其沙脊高仰。洵顯然可見。而沙脊所過之水。寬至一

千數百丈。滔滔外出。以寬抵深。過水亦不爲少。實不至如傳聞之過甚。本年黃流歸故後。又專委淮揚道曹恒查勘。比較上冬。臣查勘時。水面加增二尺有餘。出口甚爲湍激。是海口橫沙如舊。其高仰固屬不免。而不致阻遏。亦係實情。均經臣先後陳奏。卽如本年四月以來。計已長水四次。共長水一丈五尺九寸。共落水一丈二三尺。目下除底水外。僅存長水三尺上下。如果海口去路不通。則節次長水從何消去。此卽海口尙不致阻遏之明驗。至疏治海口。前明河臣潘季馴時。卽紛紛聚訟。橫沙乃海口自然之勢。歷年久遠。非人力所能施。潘季馴辯之甚明。若欲另闢海口。恐更不能如舊路之寬暢。前河臣董安國李奉翰等。另挑馬港河二套引河。旋即廢棄。舊蹟具在。未有成效。臣確案形勢。守舊則尙可安平。更張則徒費無益。又豈容輕舉妄動。虛擲金錢。是以上年冬。率同道將各員。虛衷籌商。惟有培築大隄。並將黃泥嘴一帶兜灣盤曲之處。取直開挑。以期東水刷沙。漸臻暢順。復將洪澤湖山盱五壩。封土培築高厚。嚴密堅閉。竭力蓄清。其運口之頭二三壩口門。亦儘力收窄。務令湖水少入運河。多出清口。俾全力敵黃東注。以刷淤沙。昔人所謂治淮卽所以治黃。臣自揣識淺才庸。萬萬不及前人。何能外此。而更圖良策。此臣所以遵守成法。未敢師心自用也。至南河現在形勢。臣將上下游河水長落尺寸逐細比較。徐城以上。豐蕭兩廳。上年大汛時。河底卽已刷深丈餘。迥非前數年可比。邳宿等廳。漸覺淤墊。桃源以下。至外河山。安海防等廳。河底較上兩年淤高四五六尺不等。而雲梯關以下。直至海口。水深一丈五六尺至二丈以外。並無淤阻。是上下游悉皆深暢。惟桃源至外河山海一帶。實有河身墊高之病。由去秋黃水陡落。停淤最厚。清水竟至阻斷。河身乾涸。經臣會同漕臣吉綸挑挖引渠。築壩逼溜。清水始能外出。運送回空漕船。而冬春湖水力

弱不能刷濬。入夏以來，中泓行溜之處，雖見刷深，而兩腮溜緩處所，未能全刷。計算容水之地較少，致水面擡高。四五月間，河口黃水倒灌，職此之故，非由海口阻遏爲患。所幸雲梯關以下，勢仍建瓴，溜其湍激，是以節次長水消落尙速。其河口以下，至雲梯關一帶，臣時委妥實員弁，上下測探，悉心比較。三月間，黃水未到以前，中泓原深六七八九尺之處，現深一丈二三四尺。計河底已刷深二三四尺不等。惟兩腮尙多積淤，目下清水業經外注，倒灌之患已除。河口以下，正河自可漸次刷濬。以現今水勢長落情形而論，尙無妨礙。其籌備大汛之計，惟有將各處減水閘壩堅守，非十分異漲，不令輕啓分洩，使清黃汛水得以并力刷沙。再將黃河兩岸隄埝各工，及高堰石工，節節添派人員，晝夜防範，並多籌料土，務令處處有備。臣等倍矢敬慎，實力修防，以盡心固守之誠。收束水攻沙之益，自可河底寬深，朝宗順軌。奉上諭：本年三月，衡工合龍，黃流全勢南注。其時河口清水力弱，不能敵黃，以致倒漾。其情形亦尙與往年相仿。自三月下旬，清水長發，五月以後，湖水益旺，河口一帶清水暢出，敵黃已無倒灌之虞。其雲梯關入海口門，經吳璥屢次派員測探，亦尙不致阻遏。刻下收蓄湖水，令少入運河，多出清口，全力敵黃，以收束水攻沙之效。吳璥所奏，自係實在情形。現在伏汛將臨，江境黃河縣亘千餘里，所有兩岸隄埝各工，及高堰石工，務須督率道將廳汛各員，多備人夫，晝夜防範，且近日江南一帶雨水稍多，恐河湖同時盛漲，宣洩匪易。該河督尤應加倍小心，慎重籌畫，以期有備無患。不可以現在河流暢順，稍存大意。此爲至要。南河成案續編八月二十一日刑部議：兩江總督陳大文等奏，安東民李元禮等盜決河防，審明治罪一摺。八月初七日，奉上諭：陳大文等奏審擬私挖官隄人犯一案，訊出李元禮因黃水漫灘，淹沒田廬，糾衆盜決，大隄進水。

以圖自便。郭林高教令決隄。僧人木堂極力慫恿。糾人助決。經該督等審明。將李元禮郭林高二犯問擬發近邊充軍。僧人木堂量減一等。問擬滿徒。係照本例辦理。但大隄以內均係民田廬舍。該犯等以河灘自有之田畝被淹。輒敢決隄進水。設或堵閉稍遲。水勢一經流入。則地內田廬豈不盡被淹毀。以鄰爲壑。損人利己。其居心實屬忤忍。况現當大汛。經臨隄工喫緊之時。非尋常盜決可比。陳大文等所擬罪名尙輕。李元禮郭林高僧木堂三犯著刑部另行核議具奏。其爲從僧道學等七犯。卽著照所議完結。摺并發欽此。議得據兩江總督陳大文等奏稱。緣李元禮與郭林高等至十三堡。迤下大隄。將隄面挖掘。約寬四五尺。深二三尺。掘口進水流破大隄。聽聞人聲。一齊歇手。維時該汛主簿李師綱聞信馳勘。立卽堵築。並未衝開。臣等詰訊各供無異。並究明此外並無同夥之犯。將李元禮郭盛高僧木堂擬徒。道學等擬以枷杖等因具奏。查律載盜決河防者杖一百。故決者杖一百。徒三年。因而殺傷人者以故殺論。又例載故盜決河濱一帶各隄岸。軍民俱發近邊充軍。盜決格月等隄。發附近充軍。因而殺傷人者。照律定擬各等語。查濱河隄岸。一經盜決。不惟有害田廬。亦且攸關民命。誠如聖諭。損人利己。以鄰爲壑。設或堵閉稍遲。其爲害甚鉅。若不嚴立科條。俾愚民咸知凜畏。不但法輕易犯。亦於民命河防均不足以昭慎重。請嗣後凡遇故盜決隄防之案。權衡輕重辦理。如但經故盜決尙未過水者。首犯先於工次枷號一個月。發邊遠充軍。其已經過水尙未浸損漂沒他人田廬財物者。首犯枷號二個月。發極邊煙瘴充軍。既經過水又復浸損漂沒他人田廬財物者。首犯枷號三個月。發黑龍江等處給披甲人爲奴。因而殺傷人者。照例問擬。從犯均於工次枷號一個月。各減首犯罪一等。此案李元禮郭林高僧木堂均照故盜決隄防。但經過

水尚未浸損漂沒他人田廬財物。枷號二個月發極邊煙瘴充軍。並請纂入例冊。通行各省一體遵照。仍行文管河各督撫。各於工次將新定條款出示曉諭。二十二日奉旨。李元禮郭林高二犯著照該部所擬新例次條。枷號兩個月。發極邊煙瘴充軍。其僧人木堂一犯。雖聽從愆惠。究非起意盜決。尚可末減。著仍照原擬問以滿徒。所有酌改盜決隄防罪名各條。即著纂入則例。餘依議。運河道冊。

十月初三日吳璥奏。初二日接奉上諭。據陳大文吳璥奏。河口一帶湖水消落。力不敵黃。漸覺淤淺。漕船不能挽行。已於順黃壩迤下。擇乾灘人力可施之處。挑成引河一道。以期通順等語。當即派令姜晟馳驛前往。會同辦理矣。本日吉綸奏到。河口水勢如舊。漕船阻滯。尚多等語。朕思河口淤淺。不能挽運。則糧艘回空。源源踵至。均須停泊守候。船隻日聚日多。不特火燭可慮。而水手人衆。難保無偷盜滋事之弊。卽旗丁坐食需時。亦必致有多費。況空船不能陸續進口。誠恐歸次稍遲。有悞冬兌。冬開所關匪細。朕心甚爲廬念。現在陳大文等所辦引河。是否挑挖深通。其淤沙處所。曾否爬疏暢順。漕船曾否進口。陳大文等卽由驛具奏。欽此。伏查河口之通塞。以黃河之高下爲憑。凡挑渠撈淺。固屬應辦之事。然黃水一灌。卽淤。仍須清高於黃。始能流行刷滌。是疏通之法。惟有掣減黃水。或壘高清水。斯爲正辦。前所挑引河一道。已於上月半前告成。因比較黃高於清。不便啓放。又致停淤。而漕船勢難久待。是以先於順黃壩埽工迤下。挑通溝槽。爲借黃濟運之計。無如過船將及二百。又復淤塞。九月二十五六七等日。黃河落水七寸正。望再消七八寸。湖水卽可外出。乃水定兩日。至十月初一日後。又長二寸。臣與漕臣吉綸目擊情形。焦灼莫能名狀。雖時逾霜降。黃水萬無不消之理。而回空爲日已遲。豈容束手坐待。因同道將廳營虛衷集議。減黃